

CONVENIO DE COLABORACIÓN ENTRE O CONSELLO DA CULTURA GALEGA E A FUNDACIÓN NOVACAIXAGALICIA

Na Coruña, a 8 de xaneiro de 2016

REUNIDOS

Dunha parte, dona, maior de idade, con domicilio a estes efectos en Santiago, Rúa do Vilar 19; e con D.N.I/N.I.F. nº

Doutra parte, don, maior de idade, con domicilio a estes efectos en Santiago, no Pazo de Raxoi, Praza do Obradoiro s/n, e con D.N.I/N.I.F. nº

INTERVEÑEN

Dona , en nome e representación da Fundación Novacaixagalicia (“Afundación”, en diante) entidade con domicilio social en Santiago, Rúa do Vilar 19, e N.I.F. G 70.344.205. Exerce esa representación na súa condición de Xerente e de Apoderada de Afundación.

Don, en nome e representación do Consello da Cultura Galega, con sede en Pazo de Raxoi, 2º andar, Praza do Obradoiro s/n, 15705, Santiago de Compostela, e N.I.F. Q6550003E. Exerce esa representación na súa condición de Presidente do Consello da Cultura Galega.

Afundación e o Consello da Cultura Galega denominaranse, así mesmo, colectivamente, as “Partes” e, individualmente, cando cumpra, unha “Parte”

As Partes recoñécense mutuamente capacidade legal para subscribir o presente convenio e, para ese efecto,

EXPOÑEN

-I-

Que Afundación é unha recoñecida entidade non lucrativa, constituída como unha fundación privada, declarada de interese galego, cuxa actividade está destinada a, entre outros fins de interese xeral, o desenvolvemento da cultura.

-II-

Que son funcións do Consello da Cultura Galega, conforme a Lei 8/1983 de 8 de xullo, de fundación e organización do Consello, “investigar e valorar as necesidades culturais do pobo galego. Organizar actuacións culturais axeitadas ás fins do Consello dentro e fóra de Galicia. Elevar aos poderes da Comunidade Autónoma informes e propostas a favor da defensa e promoción dos valores culturais do pobo galego”.

-III-

Que as Partes entenden oportuno colaborar para organizar a exposición “Galicia 100”, na que se exhibirán diferentes obxectos creados ou gardados en Galicia ao longo da historia (as “OBRAS”, en diante) que seleccionará o Consello da Cultura Galega, na planta 1ª e 2ª da sede de Afundación en Santiago de Compostela na rúa do Vilar, 19; entre os meses de maio e setembro de 2016.

Dita exposición denominarase en diante, a EXPOSICIÓN.

Que ambas partes manifestan a súa favorable disposición a colaborar na exhibición das OBRAS nas sedes de Afundación na Coruña e en Vigo, de forma análoga a como van facelo con motivo da EXPOSICIÓN, nos termos e condicións que ambas pacten.

-IV-

En virtude do exposto anteriormente, as dúas partes integrantes outorgan este Convenio de Colaboración que se regulará polas seguintes

ESTIPULACIÓNS

PRIMEIRA.- Constitúe o obxecto do presente Convenio de Colaboración a realización da EXPOSICIÓN.

SEGUNDA.-O Consello da Cultura Galega terá ao seu cargo as seguintes funcións e obrigacións:

1. Galicia 100 é unha exposición que presenta un relato de Galicia e da súa cultura a través de cen obxectos do seu pasado, dos cales unha selección exhibirase fisicamente e outra parte a través de audiovisual e imaxes integrada na mesma mostra.
2. Cesión a Afundación dos dereitos de exhibición sobre as OBRAS para realizar a EXPOSICIÓN, que permitan a súa comunicación pública aos efectos do convenio e durante o prazo de vixencia do mesmo.

3. Comisariado e deseño dos espazos expositivos.

4. Fornecer e facilitar a Afundación todo o material gráfico, fotográfico, e, en xeral, toda a información e documentación que sexa relevante e imprescindible para a confección e realización da promoción publicitaria da EXPOSICIÓN.

5. Deseño da EXPOSICIÓN, e da distribución da mesma na sala, que deberá contar en última instancia co visto bo de Afundación.

6. Xestión de préstamos das OBRAS, é dicir, contactos con todos os cedentes, xestión de préstamos e intercambio da documentación correspondente para obter os citados préstamos e dereitos de exhibición/reproducción.

7. Xestión e adquisición do material expositivo, isto é, achega de peañas, vitrinas, material audiovisual e demais requirimentos que presente a exposición para a súa axeitada exhibición.

8. A asunción de todos os gastos relativos á exposición non asumidos por Afundación.

TERCEIRA.-Afundación terá ao seu cargo as seguintes funcións e obrigas:

1. Informar inmediatamente e por escrito de calquera perda ou dano que sufran as OBRAS. As OBRAS danadas non poderán ser reparadas, desmontadas ou intervidas.

2. Vixilancia da EXPOSICIÓN tal como é habitual no centro en cuestión.

3. Accións de Márketing e publicidade ao xeito habitual das exposicións organizadas por Afundación.

4. Actividades didácticas nos meses de maio e xuño.

5. A asunción de custos relativos á exposición ata un máximo de 5.000,00 euros, que aboará Afundación co pago das correspondentes facturas (transporte, seguro, gráfica, comisariado,.. ou as que se consideren oportunas polo importe indicado).

6. Afundación achegará peañas e vitrinas que poidan ser necesarias sempre que conte con elas nos seus almacéns e non estean requiridas previamente para outra exposición.

CUARTA.- Para o seguimento e control do presente convenio constituirase unha comisión que estará composta por dous representantes do Consello da Cultura Galega e dous representantes de Afundación, nomeados polas respectivas institucións. Esta comisión será encargada de resolver as controversias que puideran xurdir respecto á interpretación e efectos do presente convenio.

Afundación remitirá a un interlocutor, designado polo Consello da Cultura Galega, informes periódicos que recollan a marcha dos traballos obxecto do presente Convenio.

O Consello da Cultura Galega prestará o asesoramento técnico preciso para a execución da actividade prevista no presente Convenio.

QUINTA.- O nome e anagrama do Consello da Cultura Galega e de Afundación figurarán, de xeito visible en todas as actuacións que se realicen en cumprimento do presente convenio, así como en todos os medios que se empreguen para anunciar e dar a coñecer ditas actuacións.

SEXTA.- Aos efectos oportunos, o Consello da Cultura Galega garante que conta coas autorizacións e permisos necesarios, calquera que sexa a súa índole e alcance, para levar a cabo os seus compromisos conforme ao presente Convenio, en particular en canto á organización da EXPOSICIÓN e para a cesión do resto dos dereitos aos que se estende o presente convenio, e especialmente os esixibles por razón da vixente normativa aplicable aos dereitos de propiedade intelectual, industrial e á propia imaxe que puidese afectar ás OBRAS.

SÉTIMA.- A vixencia do presente convenio estenderase desde a data da súa sinatura ata a completa finalización de todas as actividades que se realicen con obxecto do mesmo, prevista para o día 31 de decembro de 2016.

OITAVA.- Os datos de carácter persoal recollidos no presente Convenio relativos ao representante do Consello da Cultura Galega así como os demais datos do mesmo carácter que Afundación obteña como consecuencia do mantemento e/ou cumprimento do presente convenio, serán incorporados aos ficheiros de Afundación para que esta poida efectuar o tratamento, automatizado ou non, dos referidos datos de carácter persoal aos efectos da xestión da relación que se establece no presente convenio. A estes efectos, nos termos da lexislación vixente, pode exercer os dereitos de acceso, rectificación, cancelación ou oposición ante Afundación, que é a entidade responsable dos ficheiros, na seguinte dirección: COMITÉ LOPD, Rúa San Andrés 135, 2, 15003, A Coruña.

As Partes expresamente conveñen que o presente Convenio non implica nin supón ningunha asociación ou dependencia entre elas, nin outorga a ningunha das Partes facultade algunha para representar ou vincular á Parte contraria fronte a terceiros, a menos que exprese e especificamente as Partes establezan o contrario, polo que ambas Partes serán absolutamente independentes e autónomas.

O feito de que unha das Partes deixe nunha ou máis ocasións, de exercer calquera dereito ou

acción que lle asista, non poderá interpretarse como renuncia ao dereito de dita Parte a proceder a devandito exercicio en calquera momento posterior.

O presente Convenio constitúe o único acordo existente entre as Partes, e substitúe a calquera outros contratos previos, sexan verbais ou escritos.

Calquera modificación ou variación dos termos do presente Convenio requirirá o consentimento expreso e por escrito das Partes.

O Consello da Cultura Galega declara coñecer o Código Ético de Afundación.

NOVENA - No compromiso da transparencia e publicidade da actuación da Xunta de Galicia, e segundo o disposto no artigo 11 da Lei 4/2006, de 30 de xuño, de transparencia e boas prácticas na Administración pública galega, o presente convenio será obxecto da publicidade prevista na dita lei e será tamén obxecto de publicidade a teor do disposto no Decreto 126/2006, do 20 de xullo, polo que se regula o Rexistro de Convenios da Xunta de Galicia.

DÉCIMA.- O presente convenio de colaboración terá natureza administrativa rexéndose os seus efectos polo establecido nas cláusulas do mesmo e no seu defecto pola normativa xeral que lle sexa de aplicación.

No seu caso, as partes someterán as diverxencias que puideran presentarse en orden á interpretación ou cumprimento do presente Convenio á xurisdición Contencioso-Administrativa.

E para que así conste, as partes subscriben o presente Convenio de Colaboración, por duplicado exemplar, e a un só efecto, no lugar e data do encabezado.